



韓君平集卷上

五言古詩

令狐員外宅宴寄中丞

寒色凝羅幕同人清夜期玉杯留醉處銀燭
送歸時獨坐隔千里空吟對雪詩

褚主簿宅會畢庶子餞員外郎使君
開甕臘酒熟主人心賞同斜陽疎竹上殘雪
亂天中更喜宣城印朝廷與謝公

送李明府赴滑州

渭城寒食罷送客歸遠道烏帽背斜暉青驪
踏春草酒醒孤燭夜衣冷千山早去事沈尚
書應憐詞賦好

送李司直赴江西使幕

歛板辭漢廷進帆歸楚幕三江城上轉九里
人家泊好酒近宜城能詩謝康樂雨晴山西
樹日出南昌郭竹露點衣中湖煙濕扁鑰主
人蒼玉佩後騎黃金絡高祝領八州相期同
一鶚行當報知己從此飛寥廓

祭嶽回重贈孟都督

封作天齊王清祠太山下魯公秋賽畢曉日
回高駕從騎盡幽并同人皆沈謝自矜文武
足一醉寒溪夜

送南少府歸壽春

人言壽春遠此去先秋到孤客小翼舟諸生
高翅帽淮風生竹簾楚雨移茶竈若上八公
山題詩一相報

贈別崔司直赴江東兼簡常州獨孤

使君

愛君青袍色芳草能相似官重法家流名高
墨曹吏春衣淮上宿美酒江邊醉楚酪沃雕
胡湘羨糝香餌前朝山水國舊日風流地蘇
山逐青駘江家驅白鼻右軍尚少年三領東
方騎亦過小丹陽應知百城貴

七言古詩

送客之江寧

春流送客不應賒南入徐州見柳花朱橋雀

邊看淮水烏衣巷裏問王家千閭萬井無多
事闢戶開門向山翠楚雲朝下石頭城江鷺
雙飛瓦棺寺吳士風流甚可親相逢嘉賞日
應新從來此地夸羊酪自有葦羨定郤人

送山陰姚丞携妓之任兼寄山陰蘇

少府

東風香草路南客心容與白晷吳王孫青娥
柳安女都門數騎出河口片帆舉夜簾眠橘
洲春衫傍楓嶼山陰政簡甚從容到罷唯求

物外蹤落日花邊剡溪水晴煙竹裏會稽峯
才子風流蘇伯玉同官曉暮應相逐加飡共
愛鱸魚肥醒酒仍憐甘蔗熟知君鍊思本清
新季子如今德有鄰他日如尋始寧墅題詩
早晚寄西人

和高平朱參軍思歸作

髯參軍髯參軍身為北州吏心寄東山雲坐
見萋萋芳草綠遙思往日晴江曲刺船頻向
剡中回捧被曾過越人宿花裡鶯啼白日高
春樓把酒送車螯狂歌好愛陶彭澤佳句唯
稱謝法曹平生樂事多如此忍為浮名隔千
里一鴈南飛動客心思歸何待秋風起

贈別成明府赴劍南

朝為三室印晚為三蜀人遙知下車日正及
巴山春縣道橘花裏驛流江水濱公門輒無
事賞地能相親解衣初醉綠芳夕應採蹲鴟
薦佳客霽光遠映西川時間望碧雞飛古祠
愛君樂事佳興發天外銅梁多夢思

送孫潑赴雲中

黃鵠少年舞雙戟目視旁人皆辟易百戰能
誇隴上兒一身復作雲中客寒風動地氣蒼
茫橫吹先悲出塞長敲石軍中傳夜火斧冰
河畔汲朝漿前鋒直指陰山外虜騎紛紛膽
應碎匈奴破盡看歸金印酬功如斗大

送客還江東

還家不落春風後數日應沾越人酒池畔花
深鬪鴨欄橋邊雨洗藏鴉柳遙憐內舍看新
衣復向鄰家醉落暉把手閒歌香橘下空山
一望鷓鴣飛

送夏侯侍郎

元戎車右早飛聲御史府中新正名翰墨已
齊鍾大理風流好繼謝宣城從軍曉別龍驤
幕六騎先驅嘶近郭前路應留白玉臺行人
輒羨黃金絡使君下馬愛瀛洲簡貴將求物
外遊聽訟不聞烏布帳迎賓暫着紫綵裘公
庭日夕羅山翠功遂心閒無一事移書或問

島邊人立仗時呼鈴下吏事業初傳小夏侯
中年劍笏在西州浮雲飛鳥兩相忘他日依
依城上樓

送李湜下第歸衛州便遊河北

莫嗟太常屈便入蘇門嘯道在應未遲勿作
我身料輕雲日下不成陰出對流芳攬別心
萬雉城東春水闊千人鄉北晚花深舊竹青
青常繞宅到時踈曠應自適佳期縱得上官
遊旅食還為北邙客路出司州勝景長西山
翠色帶清漳仙人磯近茱萸澗銅雀臺臨野
馬岡屢道主人多愛士何辭策馬千餘里高
譚魏國訪先生修刺平原過內史一舉青雲
在早秋恐君從此便淹留
有錢莫向河間用
載筆須來闕下遊

張山人草堂會王方士

嶼花晚山日長蕙帶麻襦食草堂一片水光
飛入戶千竿竹影亂登墻園梅熟家醞香新
濕頭巾不復簪相看醉倒卧藜牀

送修縣劉主簿楚

起家得事平原侯，晚出都門辭舊游。
草色連綿幾千里，青驪躑躅路旁子。
花深近縣宿河陽，竹映春舟渡淇水。
鄴下淹留佳賞新，群公舊日心相親。
金盤曉餽朱衣鮒，玉簟宵迎翠羽人。
王程書使前期促，他日應知舉鞭速。
寒水浮瓜五月時，把君香袖長河曲。

題玉山觀禪師蘭若

玉山宴坐移年月，錫杖承恩詣丹闕。
先朝親與會，龍華紫禁鳴鍾白。
日斜宮女焚香把經卷，天人就席禮袈裟。
禪牀久卧虎溪水，蘭若初聞鳳城裏。
不出囂塵見遠公道成，何必青蓮宮朝持藥鉢。
千家近暮倚繩牀，一室空掖垣。
揮翰君稱美，遠客陪遊問真理。
薄宦深知誤此心，回心願學雷居士。

贈別上元主簿張著

上書一見平津侯，劔笏斜齊秣陵尉。
朝垂綬帶迎遠客，暮鎖印囊呼上吏。
長樂花深萬井

時同官無事有歸期回船對酒三生渚繫馬
焚香五願祠日日澄江帶山翠綠芳都在經
過地行人看射領軍堂遊女題詩光宅寺風
流才調愛君偏此別相逢定幾年惆悵浮雲
迷遠道張侯樓上月娟娟

別汜水縣尉

未央宮殿金開鑰詔引賢良卷珠箔花間賜
食近丹墀煙裏揮毫對青閣萬年枝影轉斜
光三道先成君激昂谷永直言身不顧郗詵

高地轉名香綠槐陰陰出關道上有蟬聲下
秋草奴子平頭駿馬肥少年白晷登王畿五
侯客舍偏留宿一縣人家爭看歸南向千峯
北臨水佳期賞地應窮此賦詩或送鄭行人
舉酒常陪魏公子自憐寂寞會君稀猶着前
時博士衣我欲低眉問知己若將無用廢東
歸

別李明府

寵光五世腰青組出入珠官引簫鼓醉舞雄

王玳瑁牀嬌嘶駿馬珊瑚柱胡兒夾鼓越婢
隨行捧玉盤嘗荔枝羅山道士請人送林邑
使臣調象騎愛君一身遊上國闕下名公如
舊識萬里初懷印綬歸湘江過盡嶺花飛五
侯焦石烹江筍千戶沉香染客衣別後想君
難可見蒼梧雲裏空山縣漢苑芳菲入夏蘭
待君障日蒲葵扇

送中兄典邵州

官騎連西向楚雲朱軒出餞晝紛紛百城兼
領安南國雙筆遙揮左君一路諸侯爭館
穀洪池高會荆臺曲玉顏送酒銅鞮歌金管
留人石頭宿北鴈初回江燕飛南湖春暖着
春衣湘君祠對空山掩漁父焚香日暮歸百
事無留到官後重門寂寂垂高柳零陵過贈
石香溪洞口人來飲醇酒登樓暮結邵陽情
萬里蒼波煙靄生他日新詩應見報還如宣
遠在安城

送萬巨

漢相見王陵揚州事張禹風帆木蘭曳水國
蓮花府百丈清江十月天寒城鼓角曉鍾前
金鑪促膝諸曹吏玉管繁聲美少年有時過
向長干地遠對湖光近山翠好逢南苑看人
歸也向西池留客醉踈柳垂煙橘帶霜朝游
石渚暮橫塘紅牋色奪風流座白紵詞傾翰
墨塲夫子前年入朝後高名籍籍時賢口共
憐詩興轉新清繼遠家聲在此身屈指待爲
青鎖客回頭莫羨白亭人

送巴州楊使君

白雲縣北千山口青歲欲開殘雪後前驅錦
帶魚皮鞮側佩金璋虎頭綬南鄭侯家醉落
暉東關陌上着鞭歸愁看野馬隨官騎笑取
秦人帶客旗使者下車憂疾苦家吏銷聲出
公府萬里歌鍾相慶時巴童聲節渝兒舞

送王侍御赴江西兼寄李袁州

中朝理章服南國隨旌旆臘酒湘城隅春衣
楚江水垂簾白角簾下筋鱸魚膾雄筆佐名

公虛舟應時輩按俗承流幾路清平明山靄
春江雲盜城詩贈魚司馬汝水人逢王右軍
綠蘋白芷遙相引孤興幽尋知不近井上銅
人行見無湖中石燕飛應盡禮門前直事
郎腰垂青綬領宜陽花間五馬迎君日雨霽
煙開玉女岡

寄雍丘竇明府

少年結綬騁金羈許下如看瓊樹枝入里親
過朗陵伯出門高視潁川兒西遊太府東乘
傳泗上諸侯誰不羨時輩寧將白筆期高流
竚向丹青見何事翻飛不及群虎班突騎來
紛紛吳江垂釣楚山醉身寄滄波心白雲中
歲胡塵靜如掃一官又罷行將老薛公薦士
得君初領黃金千室餘機盡獨親沙上鳥
家貧唯愛釜中魚
出重
門煙樹裏感物吟詩對暮天懷人倚杖臨秋
水別離幾日問前期鳴鴈亭邊人去時獨坐
不堪朝與夕高風蕭索亂蟬悲

贈兗州孟都督

少年親事冠軍侯，中歲仍遷北兗州。
露冕寧誇漢車服，下帷常討魯春秋。
後齋草色連高閣，事簡人稀獨行樂。
閒心近掩陶使君，詩興遙齊謝康樂。
遠山重疊水逶迤，落日東城聞望時。
不見雙親辨豐膳，能留五馬盡佳期。
北場爭轉黃金勒，愛客華亭賞秋色。
卷簾滿地鋪氍毹，吹角鳴絃開玉壺。
願學平原十日飲，此時不忍歌驪駒。

留別孟都督

平蕪霽色寒城下，美酒百壺爭勸把。
連呼寶劍銳頭兒，少駐金羈大頭馬。
一飲留歡分有餘，寸心懷思復何如。
他時相憶如相問，青鎖門前開素書。

送別鄭明府

長頭大鼻鬢如雪，早歲連兵劍鋒折。
千金盡去無斗儲，雙袖破來空百結。
獨戀郊扉已十春，高陽酒徒連此身。
路傍誰識鄭公子，谷口

應知漢逸人兒女相悲探井臼前功豈在他
人後勸君不得學淵明且策驢車辭五柳

贈別王侍御赴上都

翩翩馬上郎執簡佩銀章西向洛陽歸鄠杜
回頭結念蓮花府朝辭芳草萬歲街暮宿春
山一泉塢青青樹色傍行衣乳燕流鶯相間
飛遠過三峰臨八水幽尋佳賞偏如此殘花
片片細柳風落日踈鍾小槐雨相思掩泣復
何如公子門前人漸踈幸有心期當小暑葛
衣紗帽望回車

贈別太常李博士兼寄兩省舊遊

兩年戴武弁趨侍明光殿一朝簪惠文客事
信陵君簡異當朝執香非寓直薰差有何記
室携手李將軍玉鐙初回酸棗館金鈿正舞
石榴裙忽驚萬事隨流水不見雙旌逐塞雲
感舊撫心多寂寂與君相遇頭初白暫誇五
首軍中詩還憶萬年枝下客昨日留歡今送
歸空披秋水映斜暉閒吟佳句對孤鶴惆悵

寒霜落葉稀

寄哥舒僕射

萬里長城家一生唯報國腰垂紫文綬手控
黃金勒高視黑頭翁遙吞白騎賊光摩牙門
將轉鬪黃河北帳下親兵皆少年錦衣承日
繡行纏轆轤寶劍初出鞘宛轉角弓初上弦
步人抽箭大如笛前把兩矛後雙戟左盤右
射紅塵中鶻入鴉群有誰敵殺將破軍白日
餘回船舞旆北風初郡公循鼻好磨墨走馬
為君飛羽書

贈別華陰道士

紫府先生舊同舍腰垂彤管貯靈藥耻論方
士小還丹好飲仙人太玄酪芙蓉山頂玉池
西一室平臨萬仞溪晝灑瑤臺五雲濕夜行
金燭七星齊回身暫下青冥裏方外相尋有
知己賣鮓市中何許人釣魚坐上誰家子青
青百草雲臺春煙駕霓衣白角巾露葉獨歸
仙掌去回風片雨謝時人

送崔秀才赴上元兼省叔父

寒塘歛暮雪，臘鼓迎春早。
疋馬五城人，重裘千里道。
淮山輕露濕，江樹狂風掃。
楚縣九醞醲，揚州白花好。
練湖東望接雲陽，女市西游入建康。
行樂遠誇紅布旆，風流近睹紫香囊。
詩家行輩如君少，極目苦心懷謝眺。
煙開日上版橋南，吳岫青青出林表。

韓君平集卷上

韓君平集卷中

五言律詩

贈別韋兵曹歸池州

南陵八月暮，天色遠峰前。
楚竹青陽路，吳江赤馬船。
籬金諸客貴，佩玉主人賢。
終日應相逐，歸期定幾年。

寄武陵李少府

小縣春山口，公孫吏隱時。
楚歌催晚醉，蠻語入新詩。
桂水遙相憶，桃源暗有期。
郢門千里

外莫怪尺書遲

贈張建

結客平陵下當年倚俠遊
傳看轆轤劍醉脫
驩驩裘翠羽雙鬟妾珠簾
百尺樓春風坐相
待晚日莫淹留

送監軍李判官

上客佩雙劍東城喜再游
舊從張博望新事
鄭長秋踏水回金勒看風
試錦裘知君不久
住漢將掃旄頭

送客歸廣平

家在趙邯鄲歸心輒自歡
晚杯狐腋暖春雪
馬毛寒孟月途中破輕冰
水上殘到時楊柳
色柰向故園看

送張儵水路歸北海

千里東歸客孤心憶舊游
片帆依白水高枕
卧青州栢寢寒蕪變梧臺
宿水收知君心興
遠每上海邊樓

送故人歸魯

魯客多歸興，居人悵別情。
雨餘衫袖冷，風急馬蹄輕。
秋草靈光殿，寒雲曲阜城。
知君親覲後，少婦下機迎。

送故人歸蜀

一騎西南遠，翩翩入劔門。
客衣筒布潤，山舍荔枝繁。
古廟祠金馬，春江釣白黿。
自應成旅逸，愛客有王孫。

酬程延秋夜即事見贈

長簾迎風早，空城澹月華。
星河秋一鴈，砧杵夜千家。
節候看應晚，心期卧亦賒。
向來吟秀句，不覺已鳴鴉。

送郭贊府歸淮南

駿馬淮南客，歸時引望新。
江聲六合暮，楚色萬家春。
白苧歌西曲，黃苞寄北人。
不知心賞後，早晚從行塵。

題龍興寺澹師房

雙林彼上人，詩興轉相親。
竹裏經聲晚，門前山色春。
卷簾苔點淨，下筴藥苗新。
記取無生

理歸來問此身

送客遊江南

南使孤帆遠東風任意吹楚雲殊不斷江鳥
暫相隨月淨鴛鴦水春生萱蕊枝賞稱佳麗
地君去莫應知

送高員外赴淄青使幕

遠水流春色回風送落暉人趨雙節近馬逐
百花歸山驛嘗官酒關城度客衣從來赤管
筆提向幕中稀

尋胡處士不遇

到來心自足不見亦相親說法思居士忘機
憶丈人微風吹藥案晴日照茶巾幽興殊未
盡東城飛暮塵

贈張道者

採藥三山罷乘風五日歸剪荷成舊屋坐藥
染新衣玉粒指應久丹砂驗不微坐看青節
引更與白雲飛

題蘇許公林亭

平津東閣在別是竹林期萬葉秋聲裏千家
落照時門隨深巷靜窓過遠鍾遲客舍苔生
處依依又賦詩

送元詵還江東

過江秋色在詩興與歸心客路隨楓岸家人
掃橘林潮聲當晝起山翠近南深幾日華陽
洞寒光引獨尋

送客遊江南

桂水隨去遠賞心知有餘衣香楚山橘手鱸
湘波魚芳芷不共把浮雲悵離居遙想汨羅
上弔屈秋風初

送海州姚別駕

少年爲長史東去事諸侯坐覺千閭靜閑隨
五馬遊行人楚國道暮雪鬱林州他日知相
憶春風海上樓

送夏侯審

謝公鄰里在日夕望佳期春水人歸後東田
花盡時下樓閑待月行樂笑題詩他日吳中

路千山入夢思

送趙評事赴洪州使幕

孤舟行遠近一路過湘東官屬張廷尉身隨
杜幼公山河映湘竹水驛帶青楓萬里思君
處秋江夜雨中

送李侍御赴徐州行營

少年蕪柱史東至舊徐州遠屬平津閣前驅
博望侯向營淮月滿吹角楚天秋客夢依依
處寒山對白樓

送李秀才歸江南

過淮芳草歇千里又東歸野水吳山出家村
越鳥飛荷香隨去棹梅雨點行衣無數蒼江
客如君達者稀

題僧房

披衣聞客至關鎖此時開鳴磬夕陽盡捲簾
秋色來名香連竹徑清梵出花臺身在心無
住他方到幾回

送壽州陳錄事

壽陽南渡口
斂笏見諸侯
五雨楚雲暮
千家淮水秋
開簾對芳草
送客上春洲
請問山中桂
王孫幾度遊

送趙陸司兵歸使幕

客路青蕪遍
開城白日低
身趨雙節近
名共五雲齊
遠水公田上
春山郡舍西
無因得携手
東望轉悽悽

送蔣員外端公歸淮南

淮南芳草色
日夕引歸船
御史王元貺
郎官顧彥先
光風千日暖
寒食百花燃
惆悵佳期近
澄江與暮天

題慈仁寺竹院

千峰對古寺
何異到西林
幽磬蟬聲下
閑窓竹翠陰
詩人謝客興
法侶遠公心
寂寂爐煙裡
杏花欲暮深

贈鄆州馬使君

東方千萬騎
出望使君時
暮雪行看盡
春城到暮遲
路人趨墨幘
官柳度青絲
他日鈴齋

內知君亦賦詩

送張丞歸使幕

獨受主恩歸當朝似者稀
玉壺分御酒金殿賜春衣
拂席流鸞醉鳴鞭駿馬肥
滿臺簪白筆捧手戀清暉

贈長洲何主簿

掛席逐歸流依依望虎丘
殘春過楚縣夜雨宿吳州
野寺吟詩入溪橋折筍游
到營無一事清靜有諸侯

送崔過歸淄青幕府

平陵車馬客海上見旌旗
舊驛千山下殘花一路時
春衣過水冷暮雨出關遲
莫道青州客迢迢在夢思

田倉曹東亭夏夜飲得春字

薛公門下人公子又相親
玉佩迎初夜金壺醉老春
葛衣香有露羅幕靜無塵
更羨風流外文章是一秦

贈王逖

端隨事龍樓思閑輒告休新調赭白馬暫試
黑貂裘珠履迎佳客金錢與莫愁座中豪貴
滿誰道不風流

送深州吳司馬歸使幕

東門送遠客車馬正紛紛舊識張京兆新隨
劉領軍行驄看暮雨歸鴈踏青雲一去藪臺
北佳聲幾日聞

華亭夜宴庾侍御宅

世故他年別心期此夜同千峯孤燭外片雨
一更中酒客逢山簡詩人得謝公自憐驅匹
馬拂曙向關東

送客之上谷

地客悲秋色田園憶去來披衣朝易水匹馬
夕燕臺風剪荷衣碎霜迎栗罅開賞心知不
淺累月故人杯

同中書劉舍人題青龍上方

西掖歸來後東林靜者期遠峰春雪裏寒竹
暮天時笑說金人偈閒聽寶月詩更憐茶興

在好出下方遲

宴吳王宅

玉管蕭聲合金盆酒色殷聽歌吳季札縱飲
漢中山稱壽爭離席留歡輒上關莫言辭客
醉猶得曳裙還

題薦福寺衡嶽暎師房

春城乞食還高論此中閑僧臘階前樹禪心
江上山踈簾看雪卷深戶映花關晚送門人
出鍾聲杳靄間

送戴迪赴鳳翔幕府

青春帶文綬去事魏征西上路金羈出中人
玉筋齊當歌酒萬斛看獵馬千蹄自有從軍
樂何須怨解携

送郢州郎使君

千人插羽迎知是范安城暮雪楚山吟春江
漢水清紅鮮供客飯翠竹引舟行一別何時
見相思芳草生

送李中丞赴辰州

白羽逐青絲翩翩南下時
巴人迎道路蠻帥引旌旗
暮雨山開少秋江葉落遲
功成益地日應見竹郎祠

送劉侍御赴陝州

金羈映驪驪後騎佩干將
把酒春城晚鳴鞭曉路長
帶冰新溜澁間雪早梅香
明日懷賢處依依御史牀

李中丞宅夜宴送丘侍御赴江東

積雪臨階夜重裘對酒時
中丞違沈約才子送丘遲
一路三江上孤舟萬里期
辰州佳興在他日寄新詩

送李侍御歸宣州使幕

春草東江外翩翩北路歸
官齊魏公子身逐謝玄暉
山色隨行騎鶯聲傍客衣
主人池上酌携手暮花飛

東城水亭宴李侍御副使

東門留客處沽酒用錢刀
秋水牀下急斜暉林外高
金羈絡騾裏玉匣閉豪曹
去日隨戎

幕東風見伯勞

送祕書謝監赴江西使幕

謝監憶山程辭家萬里行
寒衣傍楚色孤枕宿潮聲
小寇不足問新詩應漸清
府公相待日引旆出江城

送江陵元司錄

新領州從事曾為朝大夫
江城竹使待山路橘官扶
片雨三江道殘秋五葉湖
能令詩思好楚色與寒蕪

送李舍人攜家歸江東觀省

二十青宮吏成名似者稀
承顏陸郎去攜手謝娘歸
夜月回孤燭秋風試夾衣
扁舟楚水上來往速如飛

送劉侍御赴令公行營

東城躍紫駟西路大刀頭
上客劉公幹元戎郭細侯
一軍偏許國百戰又防秋
請問蕭關道胡塵早晚收

送蘇州姚長史

江城驛路長煙樹過雲陽舟領青絲纜入歌
白玉郎葛衣行柳翠花簾宿荷香別有心期
處湖山滿訟堂

送金華王明府

縣舍江雲裏心閒境又偏家貧陶令酒月俸
沈郎錢黃蘗香山路青楓暮雨天時聞引車
騎竹外尚銅泉

送田舍曹汴州觀省

拜慶承天寵朝來辭漢宮玉杯分湛露金勒
借追風古驛秋山下平蕪暮雨中翩翩魏公
子人看渡關東

送張渚赴越州

白面誰家郎青驪照地光桃花開綬色蘇合
借衣香暮雪連峰近春江海市長風流似張
緒別後見垂楊

奉和元相公家園即事寄王相公

共列中台貴能齊物外心回車青閣晚解帶
碧茸深寒水分畦入晴花度竹尋題詩更相

憶一字重千金

送道士姪歸池陽

銀角桃枝杖東門贈別初幽州尋馬客霸岸
送驢車野飯秋山靜行衣落照餘燕南群從
少此去意何如

送營城李少府

懷祿兼就養更懷趨府心晴山東里近春水
北門深新綬映芳草舊家依遠林還乘鄭小
駟躡蹠縣城陰

魯中送魯使君歸鄭州

城中金絡騎出餞沈東陽九月寒露白六關
秋草黃齊謳聽處妙魯酒把來香醉後着鞭
去梅山道路長

送夏侯校書歸上都

後輩傳佳句高流愛美名青春事賀監黃卷
問張生暮雪重裘醉寒山疋馬行此回將詣
闕幾日諫書成

送李明府赴連州

萬里回南湘孤舟入桂陽諸侯近上客小吏
拜官卽春報槿花細初筵木槿芳看承雨露
速不待荔枝香

送盧大理趙侍御祭東嶽兼寄孟充

州

東嶽昔有事兩臣朝望歸驛亭開歲酒齋舍
着新衣上客鍾大理主人陶武威仍隨御史
馬山路滿光輝

送皇甫大夫赴浙東

舟師分水國漢將領秦官麾下同心吏軍中
端吳門秋露濕楚驛暮天寒豪貴東山
去風流勝謝安

送韋秀才

東人相見罷秋草獨歸時幾日孫弘閣當年
謝眺詩寒山葉落早多雨路行遲好憶金門
步功名自有期

五言排律

家兄自山南罷歸獻詩叙事

時輩已爭先吾君未着鞭空嗟緝鬚日獨是
屈腰年不以殊方遠仍論賞地偏襄橙隨客
路漢竹引歸船雲木巴東峽林中峴北川池
餘騎馬處宅是卧龍邊夜簾千峯月朝窓萬
井煙朱荷江女院青稻楚人田縣舍多瀟灑
城樓得醉眠黃苞柑正熟紅縷鱠仍鮮坐厭
牽絲倦因從解綬旋初辭五斗米唯奉一囊
錢室愛生虛白書歛守太玄櫪中嘶款段階
下引潺湲落照淵明柳春風叔夜絃絳紗儒
客帳丹訣羽人篇雅論承安石新詩與惠連
興清湖見底襟豁霧開天魏闕心猶繫周才
道豈捐一丘自無逸三府會招賢

寄贈號州張叅軍

三十事諸侯賢豪冠北州桃花迎駿馬蘇合
染輕裘觀妓將軍第題詩關尹樓青林朝送
客綠嶼晚回舟好栗分通子名香贈莫愁洗
杯新酒熟把燭故人留百雉歸雲過千峯宿
雨收兼葭露下晚菡萏水中秋憶昨陪行樂

常時接獻酬佳期雖霧散惠問亦川流開卷
醒堪解含毫思苦抽無因達情意西望日悠
悠

奉送王相公赴幽州

黃閣開帷幄丹墀侍冕旒位高湯左相權總
漢諸侯不改周南化仍分趙北憂雙旌過易
水千騎入幽州塞草連天暮邊聲動地秋無
因隨遠道結束佩吳鉤

送李中丞赴商州

五馬渭橋東連嘶逐曉風當年紫髯將他日
黑頭公不異金吾寵兼齊玉帳雄關營春雪
下吹角暮山空香麝松陰裏寒猿黛色中郡
齋多賞事好與故人同

韓君平集卷下

七言律詩

送客一歸襄陽二歸潯陽

南驅匹馬會心期東望扁舟愜夢思
斗山前春色早香爐峰頂暮煙時
空林欲訪新居士古寺應懷遠法師
兩地由來堪取興三賢他日幸留詩

送故人赴江陵尋瘦牧

主人持節拜荊州走馬應從一路遊
斑竹岡

連山雨暗枇杷門向楚天秋佳期笑把齋中
酒遠意閑登城上樓文體此時看又別吾知
小庾甚風流

送客水路歸陝

相風竿影曉來斜渭水東流去不賒枕上未
醒秦地酒舟前已見陝人家春橋楊柳應齊
葉古縣棠梨也作花好是吾賢佳賞地行逢
三月會連沙

送丹陽劉太真

長干道上落花朝羨爾當年賞事饒下筓已
憐鵝炙美開籠不柰鴨媒嬌春衣晚入青楊
巷細馬初過皂莢橋相訪不辭千里遠西風
好借木蘭橈

送客歸江州

東歸復得采真遊江水迎君日夜流客舍不
離青雀舫人家舊在白鷗洲風吹山帶遙知
雨露濕荷裳已報秋聞道泉明居止近藍輿
相訪會淹留

題張逸人園林

藏頭不復見時人愛此雲山奉養真露色點
衣孤嶼曉花枝妨帽小園春時携幼稚諸峰
上閑濯眉鬚一水濱興罷歸來還對酌茅簷
掛着紫荷巾

送劉將軍

明光細甲照 鍛昨日承恩拜虎牙膽大欲
期姜伯約功多不讓李輕車青巾校尉遙相
許墨稍將軍大莫誇闕下來時親伏奏胡塵
未盡不為家

送鄭員外

風流不減杜陵時五十爲郎未是遲孺子亦
知名下士樂人爭唱卷中詩身齊吏部還多
醉心顧尚書自有期要路眼看已在不應
窮巷久低眉

題張逸人園林

花源一曲映茅堂清論閒階坐夕陽塵尾手
中毛已脫蟹螯樽上味初香春深黃口傳窺

樹雨後青苔散點牆更道小山宜助賞呼兒
舒簾醉巖芳

寄徐州鄭使君

江城五馬楚雲邊不羨雍容畫省年才子舊
稱何水部使君還繼謝臨川射堂草遍收殘
雨官路人稀對夕天雖卧郡齋千里隔與君
同見月初圓

送襄垣王君歸南陽別墅

都門霽後不飛塵草色萋萋滿路春雙堍坡
東千室吏三鴉水上一歸人愁眠客舍衣香
滿走渡河橋馬汗新少婦北來多遠望應知
蟾子上羅巾

送王誕渤海使赴李太守行營

少年結客散黃金中歲連兵掃綠林渤海名
王曾折首漢家諸將盡傾心行入去指徐州
近飲馬回看泗水深喜見明時鍾太尉功名
一似舊淮陰

送王少府歸杭州

歸州一路轉青蘋更欲隨潮向富春吳郡陸
機稱地主錢塘蘇小是鄉親葛花滿把能消
酒梔子同心好贈人早晚重過魚浦宿遙憐
佳句篋中新

贈王隨

青雲自致晚應遙朱邸新昏樂事饒飲罷更
憐雙袖舞試來偏愛五花驕帳裏爐香春夢
曉堂前燭影早更朝更說球場新雨歇王孫
今日定相邀

題仙遊觀

仙臺下見五城樓風物淒淒宿雨收山色遙
連秦樹晚砧聲近報漢宮秋踈松影落空壇
靜細草香間小洞幽何用別尋方外去人間
亦自有丹丘

訪王起居不遇留贈

雙龍闕下拜恩初天子令君注起居載筆已
齊周右史論詩更事謝中書行聞漏滴隨金
仗入對爐煙侍玉除賀客自知來獨晚青驪

不見意如何

送劉評事赴廣州使幕

征南官屬似君稀才子當今劉孝威蠻府叅
軍趨傳舍交州刺史拜行衣前臨瘴海無人
過卻望衡陽少鴈飛爲報蒼梧雲影道明年
早送客帆歸

送冷朝陽還上元

青絲絳引木蘭船名遂身歸拜慶年落日澄
江鳥榜外秋風踈柳白門前橋通小市家林
近山帶平湖野寺連別後依依寒食裏共君
攜手在東由

送高別駕歸汴州

信陵門君識下偏駿馬輕裘正少年
霖雨送歸千里外東風沉醉百花前
身隨玉帳心應愜官佐銅行勢又全
久客未知何計是參差去借汶陽田

送康洗馬歸滑州

腰佩雕弓漢射聲東歸銜命見雙旌
青絲玉

勒康侯馬孟水金隄滑伯城臘雪夜看宜縱
飲寒蕪晝胤不妨行懷君又隔千山遠別後
春風百草生

寄上田僕射

家封薛縣異諸田報主榮親義兩全僕射臨
戎謝安石大夫持憲杜延年金裝畫出羅千
騎玉案晨食直萬錢應念一身留闕下闔門
遙寄魯西偏

送王光輔歸青州兼寄儲侍郎

幾回奏事建章宮聖主偏知漢將功身著紫
衣趨闕下口銜丹詔出關東蟬聲驛路秋山
裏草色河橋落照中遠憶故人滄海別當年
好躍五花駘

宴楊駙馬山池

垂楊拂岸草茸茸繡戶簾前花影重繪下玉
盤金縷細酒開金甕綠醅濃中朝駙馬何平
叔南國詞人陸士龍落日泛舟同醉處回潭
百丈映千峯

送長史李少府入蜀

行行獨出故關遲南望千山無盡期見舞巴
童應暫笑聞歌蜀道又堪悲孤城晚閉清江
上匹馬寒嘶白露時別後此心君自見山中
何事不相思

送端州馮使君

白晳風流似有鬚一門豪貴領蒼梧三峰亭
暗橘邊宿八桂林香節下趨玉樹群兒爭翠
羽金盤少妾揀明珠懷君樂事不可見駿馬

翩翩新虎符

送王府張參軍附學及第東歸

鄰家不識鬪鷄翁閉戶能齊隱者風顧步曾
爲小山客成名因事大江公一身千里寒蕪
上單馬重裘臘月中寂寂故園行見在暮天
殘雪洛城東

送齊明府赴東陽

綠絲帆桂爲牆過盡淮山楚水長萬里移
家背春穀一官行府向東陽風流好愛杯中

物豪蕩仍欺陌上郎別後心期如在眼猿聲
煙色樹蒼蒼

魯中送從事歸滎陽

故園衰草帶滎波歲晚知如君思何輕橐歸
時魯縞滿寒衣縫處鄭綿多萬人都督鳴騶
送百里邦君枉騎過累路盡逢知己在曾無
對酒不高歌

送李明府使蘇州便赴告期

莫言水國去迢迢白馬吳門見不遙楓樹林
中經楚雨木蘭舟上蹋江潮空山古寺千年
石草色寒隄百尺橋早晚盧家蘭室外珊瑚
玉佩徹青霄

送田明府歸終南別業

故園此日多心賞窓下泉流竹外雲近館應
逢沈道士比鄰自識卞田君離宮樹影登山
見上苑鍾聲過雪聞相勸早移丹鳳闕不須
常戀白鷗群

五言絕句

漢宮曲二首

駿馬繡障泥紅塵撲四蹄歸時何太晚日照
杏花西

繡幕珊瑚釣春關翡翠樓深情不肯道嬌倚
鈿篋篔

陪孟都督祭嶽途中有贈

封疆七百里祿秩二千石擁節祠太山寒天
霜草白

六言

宿甌山

山中今夜何人門下當年近臣青瑣應須早
去白雲何用相親

別甌山

一身趨侍丹墀西路翩翩去時惆悵青山綠
水何年更是來期

送陳明府赴淮南

年華近過清明落日微風送行黃鶯綿蠻芳
樹紫駟躑躅東城花開一杯促膝煙外千里

含情應渡淮南信宿諸侯擁旆相迎

七言絕句

送客知鄂州

江口千家帶楚雲江花亂點雪紛紛春風落日誰相見青翰舟中有鄂君

寒食

春城何處不飛花寒食東風御柳斜一夜漢宮傳蠟燭青煙散入五侯家

羽林騎

駿馬牽來御柳中鳴鞭欲向渭橋東紅蹄亂踏春城雪花頷驕嘶上苑風

看調馬

鴛鴦赭白齒新齊晚日花中散碧蹄玉勒斗回初噴沫金鞭欲下不成嘶

寄贈衡州楊使君

湘竹斑斑湘水春衡陽太守虎符新朝來笑向歸鴻道早晚南飛見主人

宿石邑山中

浮雲不共此山齊
山靄蒼蒼望轉迷
曉月暫飛高樹裏
秋河隔在數峰西

江南曲

長樂花枝雨點銷
江城日暮好相邀
春樓不閉歲
徒鎖綠水回連宛
轉橋

贈張千牛

蓬萊闕下是天家
上路新回白鼻騮
急管晝催平樂酒
春衣夜宿杜陵花

漢宮曲

五柞宮中過臘看
萬年枝上雪花殘
綺窓夜閉玉堂靜
素綆朝穿金井寒

贈李翼

王孫別舍擁朱輪
不羨空名樂此身
門外碧潭春洗馬
樓前紅燭夜迎人

漢宮曲

漢室長陵小市中
珠簾繡戶對春風
君王昨日移仙仗
玉輦將迎入漢中

少年行

千點爛熳玉勒駘青絲結尾繡纏驥揮鞭晚
出章臺路葉葉春衣楊柳風

題玉真觀李祕書院

白雲斜日影深松玉宇瑤壇知幾重把酒題
詩人散後華陽洞裡有踈鐘

送客之潞府

官柳青青匹馬嘶迴風暮雨入銅鞮佳期別
在春山裏應是人參五葉齊

送客泛五溪

南過猿聲一逐臣回看秋草淚沾巾寒天暮
雪空山裏幾處蠻家是主人

送齊山人歸長白山

舊事山人白兔公掉頭歸去又乘風柴門流
水依然在一路寒花萬木中

寄裴鄆州

烏紗靈壽對秋風悵望浮雲濟水東官樹陰
陰鈴閣暮州人轉憶白頭翁

雜言

河上寄故人

河流曉天濮水清
煙日暖昆吾臺上春
深顙頊城邊鶯聲亂
凋鴻花片細點龍泉西望
情人早至猶應得醉芳年

韓君平集卷下終



